

顏魯公集

冊四

四

五

六

七

八

九

顏魯公文集卷十五

寧鄉黃本驥仲良編訂

湘陰蔣 瓌維揚參校

外集三

顏魯公年譜

宋永春 留元剛 茂潛

中宗景龍三年己酉公生於是年其先琅琊臨沂人晉侍中西平靖侯舍之十
四世孫舍以孝義儒學名家居丹陽五代祖之推北齊黃門侍郎始爲京兆
長安人高祖思魯隋司經局校書東宮學士長寧王侍讀唐太宗爲秦王拜
記室參軍曾祖勤禮著作郎崇賢宏文館學士祖昭甫晉王曹王侍讀華州
刺史父惟貞薛王友贈太子少保

四年庚戌六月改元唐隆是月睿宗卽位七月改元景雲

景雲三年壬子正月改元太極五月改元延和八月傳位元宗改元先天

先天二年癸丑十二月改元開元

開元二十二年甲戌公年二十六考功員外郎孫逖下進士及第試梓材賦庫
詩

二十四年丙子公年二十八平判入等授朝散郎祕書省著作局校書郎

天寶元年壬午公年三十四舉文詞秀逸科元宗御勤政樓策試上第十月授
醴泉尉後黜陟使王鉷以清白名聞轉通直郎遷長安尉按本傳及神道碑
天寶初以制策甲科作尉醴泉考唐會要所載諸科如文詞秀逸皆謂之制
舉通直郎自武德定令爲從六品朝散郎從七品

五載丙戌公年三十八是歲有張長史十二意筆法記

六載丁亥公年三十九正月遷監察御史尋充河東朔方軍試覆屯交兵使
七載戊子公年四十是年充河西隴右軍試覆屯交兵使

八載己丑公年四十一又充河東朔方軍試覆屯交兵使劾奏朔方令鄭延祚
八月遷殿中侍御史時中丞宋渾爲御史吉溫崔珪誣告謫賀州公面折之
楊國忠黨於溫怒公不附己令溫諷中丞蔣冽奏公爲東都採訪判官按史

傳溫性陰詭詔事貴官以訊獄深虐李林甫才其爲擢戶部郎中兼侍御史又媚附楊國忠安祿山高力士爲國忠謀奪林甫權誣奏京兆尹蕭炅及渾逐之皆林甫所善林甫不能救後祿山領河東節度表溫自副總留事拜雁門太守以母喪解表爲魏郡太守國忠當國引拜中丞十三載祿山薦爲武部侍郎國忠與祿山爭寵溫轉厚於祿山國忠忌之發其贓狀遂斥死宋渾之謫當是溫兼侍御史時也家譜以公遷殿中在五月今從行狀

九載庚寅公年四十二二月遷侍御史

十一載壬辰公年四十四三月轉武部員外郎判南曹

十二載癸巳公年四十五楊國忠以前事銜之繆稱精擇出公爲平原太守按十三載有東方畫贊碑陰記云去歲拜此郡則以是年出守明矣

十三載甲午公年四十六十二月有東方先生畫贊碑陰記

十四載乙未公年四十七轉兵部員外郎時安祿山反河朔盡陷獨平原城守具備使司兵參軍李平馳奏元宗始聞亂數曰河北二十四郡無一忠臣邪

及平至大喜顧謂左右曰朕不識顏真卿何如人所爲乃若此謹按公嘗爲殿中侍御史與仲昆左補闕允南同列臺省每朝賀宰相已下登殿者不過三十人公與允南二拱法座於含元殿朝覲宴集必同行列夫以拱承天辟執憲殿中久賜清問參陪左右不爲疏逖者矣平原出守才三年耳已有不識之問元宗末年怠荒蠱於妖嬖昏昧至是安得不稔胡雛之禍哉

十五載丙申七月肅宗卽位改元至德公年四十八正月加戶部侍郎兼平原郡太守三月兼河北招討採訪使七月拜工部尙書兼御史大夫平原郡太守河北招討採訪處置等使有皇帝卽位賀上皇表有修書帖十月史思明尹子奇圍河間公遣和琳往救思明逆戰擒之河間陷又使康沒野波將先鋒攻平原公謀於衆賊銳不可抗乃渡河

肅宗至德二載丁酉公年四十九朝於鳳翔授憲部尙書有讓表六月兼御史大夫有謝表新史行狀月日不同今從家譜九月丁丑廣平王俶平西京十月壬戌平東京癸亥肅宗發鳳翔丙寅入西京太廟爲賊所焚肅宗素服向

廟哭三日按本傳兩京復公建言春秋新宮災魯成公三日哭今太廟爲賊
毀請築壇於野皇帝東向哭宰相厭其言十一月出爲馮翊太守有謝上表
三載戊戌二月改元乾元公年五十三月除蒲州刺史有謝上表四月有謝晉
王曹王侍讀贈華州刺史表按通鑑杲卿姊妹及泉明之子流落河北是年
公守蒲使泉明往求之九月有祭姪贈贊善大夫季明文十月除饒州刺史
有華嶽廟題名至東京拜掃有祭伯父豪州刺史文豪州按通典春秋末鍾
離子之國晉僑置徐州安帝時爲鍾離郡宋廢入南兗州齊置北徐州北齊
爲西楚州隋開皇二年以地枕濠水更曰濠州自大業至唐武德天寶乾元
改爲郡若州者再地理志謂濠字初作豪元和三年改從濠元和郡國志
當作濠字中間誤去水元和三年字又加水彭晁社亭記碑陰載武德間州
印豪字亦不從水元和二年御史崔公中奏請依舊以濠水爲州名三年八
月敕豪從水省司重造新印考之濠州乃開皇舊名武德以後始作豪也今
舊集作濠誤當從碑本

乾元二年己亥公年五十一有顏司徒碑銘六月爲昇州刺史充浙西節度使兼江寧軍使有謝表江寧郡以元年改置昇州兼浙西節度觀察使是年有與蔡明遠帖李侍御寫真贊有天下放生池碑銘按放生池碑陰記及碑銘所載皆在二年湖州碑陰記後乃書作二年三月攷之乞御書碑額表云去年冬任昇州刺史日述碑銘一章自書絹本附史元琮奉進乞御書題額以光揭不朽緣前書點畫稍細恐不經久今謹據石擘窠大書一本奉進特乞聖恩俯遂前請然則碑銘必是年所作而再進擘窠之本在於次年故繫以改書之年月耳藝文類聚有梁元帝荊州放生亭碑世謂放生建碑始於唐非也

三年庚子閏四月改元上元公年五十二時劉展將反公豫飭戰備李岍以爲生事非短公二月追爲刑部侍郎有乞御書天下放生池碑額表八月貶蓬州長史按離堆記以言事忤旨本傳云上皇遷西內公率百官問起居李輔國惡之行狀神道碑又謂爲御史中丞敬羽所誣然二事皆在公貶貳之時

也

上元二年辛丑九月去年號稱元年以十一月爲首歲

元年壬寅復以建巳爲四月改元寶應是月代宗卽位公年五十四五月有鮮于氏離堆記拜利州刺史屬匡賊圍城不得入追赴上都十二月劉晏讓爲戶部侍郎有謝表有顏司業碑

寶應二年癸卯七月改元廣德公年五十五三月改吏部侍郎有謝表八月除江陵尹兼御史大夫充荆南節度觀察處置使有謝表未行授代十月轉尙書右丞有臧尙書碑銘

代宗廣德二年甲辰公年五十六正月以檢校尙書兼御史大夫充朔方行營汾晉等六州宣慰使招諭僕固懷恩不行遂知省事二月有與李太保帖十一月有與郭僕射書郭公廟李臨淮碑銘按郭英乂爲尙書右僕射封定襄郡王驕蹇侈汰陰事元載魚朝恩以久其權明年嚴武死以英乂爲成都尹充劍南節度使自以有內主肆志無有所憚崔旰反英乂奔靈池普州刺史

韓澄殺之是月又與李太保帖

永泰元年乙巳公年五十七八月有孫逖文公集序閏十月有與李太保帖有

顏祕監碑銘

二年丙午十一月改元大曆公年五十八時元載多引私黨畏羣臣論奏乃給
代宗曰羣臣所奏多挾私讒毀請自今論事先白長官長官白宰相宰相定
可否然後奏聞公有百官論事疏攝事太廟言祭器不飭載以爲誹謗二月
貶峽州別駕時又有廟享議朝會有故去樂議三月移佐吉州道出溧水有
弔烈士左伯桃詩六月有東林寺西林寺題名歐陽公脩集古錄按唐書公
爲元載所惡貶峽州員外別駕撫州湖州刺史載誅復爲尙書而不言其再
貶至新史始載本末蓋攷諸碑陰記及題名也

大曆二年丁未公年五十九正月有鮮于少保碑銘十月有靖居寺題名守政
帖廬陵集十卷

三年戊申公年六十五月除撫州刺史按魏夫人麻姑華姑仙壇記乞御書題

額恩勅批答碑陰記並在是歲家譜誤作二年當以記爲據有書馬伏波語
四年己酉公年六十一四月歸祔季弟少尹於上都時同生十人零落皆盡惟
公獨存有寶應寺翻經臺記魏夫人華姑壇記碑

五年庚戌公年六十二五月有麗正殿學士殷君墓碣銘十二月有宋開府碑
銘

六年辛亥公年六十三三月有寶應寺律藏院戒壇記閏三月臨川代到四月
有南城縣麻姑山仙壇記是年有晉侍中西平靖侯顏公大宗碑又有左輔
元編次所賦爲臨川集十卷

七年壬子公年六十四有八關齋報德記九月至東京除湖州刺史十一月發
東京有與夫人帖

八年癸丑公年六十五正月至任七月追建放生池碑銘按杼山妙喜寺碑云
大曆七年蒙刺是邦觀察判官御史袁君高巡部會於此土遂立亭於東南
陸處士以癸丑歲冬十一月癸卯二十一日癸亥建名曰三癸又云自典校

時著韻海鏡源未遑刊削壬子歲叨刺於湖公務之隙與沙門法海李愕陸羽褚沖湯某柳察潘述裴循蕭存陸士修楊遂初崔宏楊德元胡仲湯涉顏祭韋介左興宗顏策以季夏於州學及放生池討論至冬徙於茲山來年春遂終其事考之乞御書題額恩勅批答碑陰記公七年秋九月歸至東京起家除湖州刺史來年春正月至任放生池碑後亦書云七年秋九月己亥蒙除不應壬子之九月至京癸丑之正月至任而壬子之季夏與羣士討論於州學冬復徙於杼山癸丑之春遂成書而終事碑銘曰三癸嶙峋又曰紛吾著書羣彥惠臻言羣彥著書於三癸之亭也夫旣大曆七年蒙刺是邦癸丑十月方有此亭安得壬子之冬羣彥已集是必寺碑傳寫於金石剝落之餘誤以癸丑爲壬子當終事於甲寅之春也郡有韻海樓未徙杼山時所建是年有題三癸亭酬陸處士折青桂花見寄詩水堂送諸文士戲贈潘丞聯句十二月有沈氏述祖德記元靖李先生碑銘公在郡及門生弟姪多攜壺機檝以遊峴山觀左相石罇聯句序謂因積溜深石嵌爲罇形酌酒其中結宇

環飲

九年甲寅公年六十六正月作干祿字書序書於刺史宅東廳院又有韻海鏡源公天寶中守平原與封紹高簣族弟渾修成二百卷屬祿山作亂止存四分之一及刺撫州與左輔元等增廣成五百卷至是刊削繁辭纂而成文凡古今文字該於理者撫筆撮要罔有不備爲三百六十卷是年有乞御書題額恩敕批答碑陰記妙喜寺碑贈僧皎然詩

十年乙卯公年六十七有元次山表墓碑銘歐陽領軍碑銘

十一年丙辰公年六十八四月有崔孝公陋室銘記初霅溪東南有白蘋洲梁太守柳惲江南曲汀洲採白蘋日暮江南春後人因以名洲至是公始翦榛導流作八角亭及茅亭書惲詩於上有康使君碑銘

十二年丁巳公年六十九四月有柳惲西亭記吳興集十卷元載誅楊綰薦公四月召於湖州五月有項王碑陰述八月爲刑部尚書

十三年戊午公年七十正月三抗章乞致仕不允二月有過瑤臺寺懷圓寂上

人詩是年進吏部尚書按家譜以十二年十二月爲吏部尚書充禮儀使攷舊史記及詩序今年正月乞致仕二月謁昭陵猶爲刑部尚書不應十二年已除吏部今參之行狀神道碑史傳所載先後進吏部當在今年充使乃代宗晏駕之後也

十四年己未公年七十一五月代宗崩德宗卽位充禮儀使七月奏列聖謚繁有請復七聖謚號狀時袁倬議云陵廟玉冊已刻不可輕改倬蓋妄奏不知玉冊皆刻初謚而已又有論元皇帝祧遷狀

德宗建中元年庚申公年七十二七月有顏少保碑銘時楊炎當國公以直不容八月爲太子少師依前禮儀使有左輔元所編禮儀集十卷

三年壬戌公年七十四上方倚以爲相盧杞忌之八月改太子太師罷其使四年癸亥公年七十五正月李希烈陷汝州盧杞建議遣公爲宣慰使往諭之公卿失色李勉密表固留不報既至宣詔旨希烈養子千餘人交刃脇公後又囚於官舍守以甲士掘方坎於廷傳將坑之期公毀節公謂希烈曰死生

有定何多端一劍見與卽覩快事希烈不敢逼

興元元年甲子公年七十六有奉命帖題驛舍壁會周曾等謀襲汝州奉公爲節度事洩希烈殺曾等拘送公於蔡州

貞元元年乙丑公年七十七正月有移蔡帖時公已幽辱三載矣度必死乃自作遺表墓誌祭文指寢室西壁下曰吾殯所也八月希烈使閹奴與辛景臻等縊殺公於龍興寺

二年丙寅四月希烈爲牙將陳仙奇所殺蔡州平十一月奉公喪歸葬於萬年縣之鳳棲原公之死也舊史記云貞元元年正月始聞廢朝贈諡傳乃謂死於興元元年八月新史記以爲貞元元年之八月神道碑前書日月同舊傳後又云貞元初遇害希烈之誅新舊史記作今年四年舊史傳復云貞元元年仙奇護公喪歸攷之遺蔡帖貞元元年自汝移蔡行狀及嗣曹王臯柳垕常侍言旨並云是年八月賊命辛景臻等於蔡州龍興寺縊公明年希烈死仙奇歸喪則舊史記傳不但書公之死先後失次而平蔡歸葬之年亦復差

互令狐岢固自戾其說而通鑑復取諸舊史何邪恐他有所據新史當必見
行狀與移蔡之帖也新史公年七十六舊史七十七按大曆十三年公年七
十爲刑部尙書三抗章乞致仕不允後死於貞元元年當是七十七

顏魯公文集卷十五

顏魯公文集卷十六

寧鄉黃本驥仲良編訂

湘陰蔣 瓌維揚參校

外集四

寄韋南陵冰余江上乘興訪之遇尋顏尚書笑有此贈

唐隴西

李白

太白

南船正東風北船來自緩江上相逢借問君笑語未了風吹斷聞君攜伎訪情人應爲尙書不顧身堂上三千珠履客囊中百斛金陵春恨我阻此樂淹留楚江濱月色醉遠客山花開欲然春風狂殺人一日劇三年乘興嫌太遲焚却子猷船夢見五柳枝已堪挂馬鞭何日到彭澤長歌陶令前

案此詩乾元二年太白流夜郎中途遇赦還憩漢陽時作王琦太白年譜注云肅宗時尙書而顏姓者惟魯公一人則所尋之顏尙書必魯公也唐書乾元元年顏真卿由工部尙書出爲饒州刺史二年六月由饒州刺史爲昇州刺史充浙西道節度使此詩應在六月以前魯公在饒州時作故以彭澤陶